

四庫全書

史部

欽定四庫全書

閩中理學淵源考卷十八

廣平府知府李清馥撰

朱子泉州門人并交友

泉自唐歐陽四門先生開閩學之先迨五季俗敝波靡宋興此邦人文漸著賢哲踵生惟時周程派系多屬上游至子朱子臨莅同安闡明聖學崇獎名教泉之學士斌斌嚮風矣厥後陳後之劉叔文楊至之許

順之親承言論蔡白石陳北溪遞衍師說與呂樸鄉
丘吉甫後先輩出時謂之清源別派志乘載考亭道
脉傳入溫陵所著錄者二十餘人若傅氏竹隱父子
陳氏知柔黃氏維之與公知契尤篤至末造呂丘諸
賢或隱身明志或守義不辱嗚呼豈特其亮節可風
哉亦平昔辨志居業為有本也夫泉之習尚在嘉祐
治平之際猶以勲業名位為烜赫迨至朱子啟發講
明風氣一變重以王梅溪真西山漸摩德化禮教大

明尚論者知朱真諸大儒之澤矣而遞續師傳羽翼
斯義諸君子亦皆持道化之盛也回溯風猷寧能忘
崇仰哉

柯國材先生翰

柯翰字國材同安人孝謹誠慤自守介然及門授經人
以百數文公朱子簿同安屬治學事引翰自助翰內行
峻潔衆嚴憚之久皆化服葺廬以居取揚子所謂三年
通一經者以名其堂文公為作一經堂記

按紫陽文公門徒惟同安諸生受業最早有柯國材翰許順之升陳氏齊仲徐氏元聘諸先生考文公與國材書云戴陳二生趣向文辭皆可觀固知其所自矣有友如此足以為仁敢以為足下賀而僕亦將有賴焉又云某自延平逝去學問無分寸之進汨汨度日無朋友之助未知終何所歸宿云云又曰李君好學禮賢其志可嘉國材想亦推誠與之講論有可采處若得同為此來真寡陋之幸又曰石文相聚所談何事其篤誠好學已不易得而議論明快想講論之際少所凝滯也又云前此以陳許二友好為高奇喜立新說往往過於義理之中正故常因書箴之蓋因其病而藥之非以為凡講學者皆當盡於淺近而遂止也又云凡此皆石文書中未及盡布者或因講論之次間為及之并以呈齊仲順之不知如此早說還可高意否二公更不及別書也徐文惠書云有疑難數板却未

見之豈封書時遺之邪觀書中諸人陳許二友似
指齊仲順之徐文未知是元聘否李君并戴陳二
生未詳石丈疑是同安丞石整子重朱子與往復
書甚多係會稽人又按淳熙四年二月文公祭
國材文曰余少之時承史君里實始識君敬慕興
起致君序室以表後生講誦洋洋德義振聲又曰
惟君之德剛毅近仁望之可畏即之可親云
云道南源委郡志邑志朱子大全集

許順之先生升

許升字順之別號存齋同安人生長華宗視紛華勢利
無足動心獨有志聖賢之道朱子簿同安公年十三即
從講學淬勵五年秩滿復從北歸覃思研精學力大究

朱子稱其學專用心於內嘗書存齋二大字授之使扁
書院復為之記臨別宿雲際寺朱子送以詩曰薄暮投
花縣聯車入翠微長林生缺月永夜照寒扉清話欣無
數離懷悵有違勉焉彊毅力千里要同歸又云門前三
徑長蒿萊愧子殷勤千里來校罷遺書却歸去此心原
自不曾灰至家朱子兩與書微示養氣修齊之意在哀
經之年動閑禮度擬古自我朱子嘉之令校程氏語錄
公曲折訂正論量朱子答書甚悉居家偕同志陳齊仲

肄業淨隱寺又與石子重徐元聘柯國材陳汝器王近
思等友善後遍交四方之士若范伯崇廖德明林擇之
許敬之等或相過從或往來書問論道肄業朱子稱其
恬淡靜退無物欲之累所著有孟子說禮記文解易解
等書並湮滅無傳

按文公與王近思札云汝器諸友相聚日所講者
何事即傳中陳汝器否又朱子大全集門人姓氏
錄有林汝器同安人未知孰
是舊志新志彙同書

陳先生齊仲

金史卷八十八
陳齊仲同安人從文公游文公勉其務實

徐先生元聘

徐元聘同安人號芸齋名未詳文公曾為作芸齋記附

文公與順之書曰國材元聘為況何如昨寄得疑難來

又是一般說話大抵齊仲順之失之太幽深

順之尤甚

而三

公失之太執著

執著者有時而通幽深者蕩而不返矣

中間一條平坦官

路却無人行著只管上山下水是甚意思因書可錄此意及二序送之為致不及書之意范伯崇學大進劉德

明者亦稍識理趣皆可喜耳伯崇去年春間得書問論語數段其說甚高妙因以呈李先生李先生以為不然令其慙實做功夫後來便別此亦是一格也然其當時高妙之說亦只是依諸先生說而推言之過當處耳非如順之所示硬將文義拘橫說却也切宜速改至祝至祝

按文公與許順之書言國材元聘為況何如書中又言李先生則諸人皆在孝宗隆興以前及門者故列在前云

縣丞陳後之先生易

陳易字後之永春人從朱子游朱子嘗稱後之及安卿
為學頗得蹊徑次第又與楊至書云彼中朋友後之講
論可師或問延平驗中於未發之前是何氣象易曰持
守良久亦自可見蔡和恒請質焉淳熙四年以明經登
鄉薦慶元二年進士仕終福州懷安丞居喪叅酌古禮
不用浮屠鄉閭化之著有語孟解

新郡志藁

劉叔光先生鏡

劉鏡字叔光惠安人厭科舉之習淳熙間從朱子學主
於涵養體察稱高弟

附

劉叔文先生

劉叔文名未詳朱子與楊至之書云彼中朋友後之講
論可師叔文持守可法諸友若能頻與切磋必有益也
又與李亢宗書云陳後之持守見識皆不易得劉叔文
守得亦好但未知後來所見如何耳

按二公為師門稱許如此其為高弟無疑再按朱子稱彼中朋友後之講論可師叔文持守可法後之陳易字則叔文亦劉之字也所云彼中朋友似均屬泉人再按劉鏡字叔光惠安人其學主涵養體察稱高弟朱子集中泉郡諸門徒多掛及其姓氏即往復書中亦多及之獨遺劉叔光鏡或疑叔光叔文字畫相近或傳寫差訛或別有其人謹將叔文錄附叔光傳後待考焉

備考

朱子答劉叔文書曰所謂理與氣決是二物但在物上看則二物渾淪不可分開各在一處然不害二物之各為一物也若在理上看則雖未有物而已有物之理然

亦但有其理而已未嘗實有是物也大凡看此等處須認得分明又兼始終方是不錯只看太極圖熹所解第
一段便見意思矣若未會得且虛心平看未要硬便主
張久之自有見處不費許多閑說話也如此虛心理會
不得時却守取舊來所見未為晚耳如或未然且放下
此一說別看他處道理尚多或恐別因一事透著此理
亦不可知不必守此膠漆之盆枉費心力也

又曰細詳來喻依舊辨別性氣兩字不出須知未有此

氣已有此性氣有不存性却常在雖其方在氣中然氣自氣性自性亦自不相夾雜至論其徧體於物無處不在則又不論氣之精粗而莫不有是理焉不當以氣之精者為性性之粗者為氣也來說雖多只以此意思之便見得失如云精而又精不可名狀所以不得已而強名之曰太極又曰氣愈精而理存焉皆是指氣為性之誤又引通書解云云亦是不察陰陽二字是形而下者便指為誠不知此是誠之流行歸宿處不可便指為誠

也又引無極之真以為真固是理然必有其氣是以可與二五妙合而凝此尤無理矣夫真者理也精者氣也理與氣合故能成形豈有理自有氣又與氣合之理乎其間瑣細不暇一一辨論但更看太極圖解第一段初兩三行便見理之與氣各有去著不待如此紛紜矣

楊至之先生至

楊至字至之晉江人遊文公之門蔡元定奇之妻以女焉著天道至德天道至教二圖以發明為士希聖盡人

合天大旨記所聞於朱子者為語錄二卷

按文公答楊至之書略曰向嘗面說至之有膚淺之病不知曾究其所以然而加濬治之功否後之歸永春後曾復來否子順子能為學復何如彼中朋友後之講論可師叔文持守可法諸友若能頻與切磋必有益也漳州朱飛卿近到此病作未得細講陳淳者書來甚進異日未可量也讀此書知泉漳彼時學徒次第尋學派者即此可想見大略此書在知漳州以後之札中言後之即陳易叔文詳見叔文補傳

楊子順先生履正

楊履正字子順晉江人朱子門人朱子稱其為學細密

有生徒數百人

按文公答子順書云學雖以躬行力踐為極然未
有不由講學窮理而後至又曰來書所論為學大
意似已得之但賢者本自會說說得相似却不為
難只恐體之未實即此所說皆是空言不濟事耳
又曰至之粗疎不
如子順細密云

王近思先生力行

王力行字近思同安人與陳易楊至楊履正劉鏡淳熙
間皆游朱文公之門公謂其明敏有餘而少持重因勉
以為己功夫自是苦學善問深得旨趣所著有朱氏傳

授支派圖文公語錄一卷大全集載其問答甚多

按朱子語錄姓氏載王近思錄文公語在紹興二年辛亥所聞時文公年六十二在知漳州後也其受業文公年歲傳中載在淳熙間再按文公與許順之書云徐柯二丈及汝器近思諸友相聚說何等話云云徐似指徐元聘柯似指柯國材考文公淳熙四年有祭柯國材文則此公當在淳熙四年以前及門無疑也

李子能先生亢宗

李亢宗字子能泉州南安人立志問學服習儉素儼然一儒生無貴介氣習文公稱之

按文公答李子能書略曰累承喻及為學之意甚善但如此用力頭緒太多令人紛擾無進步處故程先生說涵養須是敬進學則在致知

張子文先生巽

張巽字子文一字深道五代漳州刺史清溪之裔父寓奉議郎知臨江軍嘗與張南軒共學淳熙中南軒講學長沙城南書院寓遣子巽從之游及歸贈以二詩指示為學根本且致屬望之意其詩曰秋風木葉落送客麗樵東豈懷兒女戀愛此趣味同至理無轍迹妙在日用

中聞言有不信渠自馬牛風吾子實所畏立志高冥鴻
卓然遊聖門不受異說訐切磋豈不樂愧非斷鼻工於
皇太極蘊精微浩無窮願言終玩繹默參元化工又曰
人言底柱險袖手不敢邇孰知人心危毫釐千萬里由
來事物繁酬酢無披靡雖云應不難要且辨真偽良知
本易直天機驗所起涵濡自日新日新乃無蔽聖學非
空言要領故在此吾子端發源所進渺涯涘我雖念不
敏詎敢忘所止後會儻有時深功同舉似南軒之教使

人先察天理人欲之分而培養擴充以復其性其於聖賢微言多以所自得義理為之解說明透灑落人人易曉巽既受師傳以歸杜門玩養寡交於人人亦鮮知之者是時晦菴之學盛行於泉謂之清源別派其學者如楊至至之陳易後之輩持守講論多可觀惠安有劉鏡叔光者稱為高弟巽間從之遊因得所聞於晦菴者未能釋然曰恐晦菴之教不止此也乃走武夷謁晦菴晦菴以所嘗與南軒講論中和之旨告之曰此某與南軒

晚年畫一功夫也臨別又請教晦菴曰南軒記嶽麓某
記石鼓合而觀之知所用力矣巽退而喜曰吾固謂其
不止是也既歸日從事於涵養體察久益明靜人或勸
其著述對曰尊其所聞則高明矣行其所知則光大矣
吾於所聞所知尚未能加意安敢妄作有草堂在錦溪
之上學者稱為錦溪先生

惠安邑志

按文公撰衡州石鼓書院記在淳熙十四年丁未
夏四月時文公年五十八子文在作記後從學自
屬晚年矣

郎中高潁叔先生禾

高禾字潁叔泉州晉江人淳熙八年進士歷福清仙遊
令知惠州除將作監丞大理寺正兵部郎中奉祠卒陳
宓作墓誌其略曰公端方而重和易以莊色夷氣清可
畏而愛始微有知則知學問日開日益卓然早茂叔伉
倅臨漳朱文公時綰郡符公執子姪門弟子禮卑以恭
文公深器之義利之間辨析杳微非所當得一介不取
待人接物宛若處子或意外干以私正色拒絕雖賁育

不能抗歷州縣持使節閩廣之人至今頌之

林先生巒

林巒晉江人文公門人能推所聞以講學閭里

按先生曾以所為文三篇以質文公公答書略曰
學之道非汲汲乎辭必其心有以自得之則其見
乎辭者非得已也今足下類多採摭先儒數家之
說以就之所以自得者何如哉足下改之甚善又
答書論中庸喜怒哀樂未發數章末云讀書且虛
心看此一處文義令語意分明趣味淡洽乃佳切
不可妄引他處言語來相雜非惟不
相似且是亂了此中正意血脉也

黃先生謙

黃謙南安人父命之入郡學習舉業謙棄去從學於父
公公曰既是父命習舉業何不習郡學舉業與理學不
相妨如拂父之命則父子相夷矣何以學為

徐先生應中

王賓

徐應中同安人王賓晉江人俱進士按朱子為同安簿
請徐王二先生充學賓申縣劄曰縣學教集生徒漸成
次第但職事員數既多又皆頗有分職以此不得專意
教導竊見本縣進士徐應中留意講學議論純正進士

王賓天資樸茂操理堅慤求之流輩未見其比乞從縣
司行下本學具禮敦請赴學特給厨饌待以賓客之禮
不惟使生徒覩其言行得以矜式庶幾士民向風有所
興勸云

按朱子申請本縣徐應中王賓以充學賓俱稱進
士考闕書諸志登科年分無可疑疑是遺錄今當
以朱子申請為據入之學派
中蓋平昔必經薰炙無疑也

許子春先生景陽

許景陽字子春同安人從文公游文公稱其說話意趣

儘好恨不得款曲議論

閩書

按朱子大全文集卷七詩編內有山北紀行詩詩
未自註同行諸人云廬陵許子春景陽溫陵吳蕪
善仲達又考大全別集朱子題折桂院行記在淳
熙八年辛丑內有溫陵許景陽則景陽又屬溫陵
人俱不可曉又考黃勉齋先生集與余瞻之書云
廬陵書信遞去良久旦夕雖有回訊當得尋便納
往景陽書向說比亦收書看周禮甚有味亦作書
挽其歸恐遂為廬陵人未可知也按此或是溫陵
遷寓廬陵耳再按羅氏大經鶴林玉露載朱文公
帖稱景陽姓許字子春季章姓劉名黼皆廬陵醇
儒從文公學羅
亦廬陵人云

縣令黃景傅先生巖孫

黃燾孫字景傳惠安人寶祐四年進士授仙谿尉興學
校修邑志治梁橋水利一以義理之學為政作思賢堂
以祀前尉段全凌景陽二公并作堂記咸淳間令尤溪
重新南溪書院建四齋及講堂以棲學者復作夫子燕
居堂錄朱子所作太極通書西銘三書解及與門人問
答書疏散見文集語類中者及後儒之說有發明者申
以己意薈萃成篇倫類通貫名曰輯解刊於書院未幾
通守福州又校刊西山讀書記皆行於世

郡守曾泰之先生秘

以下交友

曾秘字泰之同安人乾道五年進士與朱子友善薦授國子監丞知惠州繕亭驛增冷泉叱馭秀麓等菴以濟行者後知漳州卒

按朱子於淳熙十年撰漳州龍巖縣學記曾言溫陵曾君秘來嗣具丞職又曰嘗從吾友石許諸君遊是必能誦其所聞以先後之者意曾公在同安時與朱子相識石許疑是石子重許順之否待考

提舉趙彥忠先生惇

趙惇字彥忠父思誠為泉州守因居晉江惇與朱子友

善為福建運管以鹽法病民請恤竈戶均敷額歲衍鹽百萬斤知惠州覈吏欺弊得米七千斛錢五萬緡公入既充斥其餘以惠民政以最聞歷提舉常平卒於官子誼聚書萬卷知富陽縣說守南恩州

郡志

州守儲行之先生用

儲用字行之晉江人淳熙十一年進士知建陽有惠政朱子亟稱之會黨禁起罷去後道縣治民擁車大呼曰此好官長我輩共思之起知襄陽鄧民樊快明率衆來

附制司欲勸之用爭於朝復力言於制閫大恚之罷用
歸時海寇犯泉境與守真德秀合謀抵海島擒其酋餘
黨遁去後直文華閣知惠州未上卒子耀知雷州

郡志

州守蔡光烈先生茲

以下知舊

蔡茲字光烈永春人問學有聲從遊甚衆蚤以明經領
鄉薦復以詞賦第紹興十二年進士仕至南恩守秩滿
雅有林泉之想丞相梁克家當軸除茲廣德憲控辭甚
力遂掛冠歸築室東偏扁曰燕堂後取邵康節齒髮既

哀非昔日林泉能老是長春之句復改其堂曰長春日
與賓友觴咏其間茲嘗於紹興二年為建州貢院考官
謂人曰吾取中一後生讀其三策皆欲為朝廷措置大
事他日必非常人乃朱熹也其巨眼如此

按傳中稱紹興二年為建州貢院考官取中朱子
考紫陽年譜朱子生於建炎四年庚戌至紹興二
年壬子方三歲其年分傳寫錯誤無疑蔡公於紹
興十二年登第朱子於紹興十七年貢於鄉十八
年登第意蔡公自是登第後為建州考官否謹識
之待考查永春舊志泉郡舊志闕書諸書相沿皆
作紹興二年
疑皆承誤

閩中理學淵源考卷十八

欽定四庫全書

閩中理學淵源考卷十九

廣平府知府李清馥撰

朱子興化門人并交友

按莆儒風之盛得中州派的先於七閩者始於方景通先生峻與其子元寀交識程大中公薰炙於二程之學深矣艾軒林氏亦聞其風而興起者至朱子之學興宗仰徧於海隅若陳若方受學彌勵厥後習尚

醇篤忠節林立其士風家法盛衰興廢之變昭然可
覩矣嗚呼君子之澤豈獨五世而斬哉

通判余景思先生元一

余元一字景思興化軍仙遊人娶三山黃御史瑀之女
遂與瑀子幹師事文公始見之日以仁義禮智信分作
五論及自著文為贊間與幹講論有異同輒以質諸文
公嘗有答余景思書見文公別集淳熙五年登第歷奉
議郎知泉州同安縣嘗立蘇緘祠於其故居文公甚喜

之為縣以清嚴稱終池州通判弟宗龜同登進士

考亭

淵源錄 莆陽文獻

按文公少年時過莆即獲交林謙之方次雲後與陳正獻魏公龔大參公又極厚莆中傳朱子之學者方陳二家子弟最盛其餘諸賢亦多彬彬林立見於集中往復書札可考文公與景思書云魯叔兄弟幾人今皆年幾何莫亦能自卓立否欲作書慰之以病未能當俟後便也按魯叔為朱魯叔也其兄弟事實未詳朱子別集曾載有答書錄姓氏見後

林若時先生得遇

林得遇字若時興化仙遊人一日發憤鬻產裹糧至武

夷叅拜文公文公令日講論語集註頓悟明理能文及
文公歿復往會葬暮年與同縣陳沂相友善

黃子洪先生士毅

黃士毅字子洪自興化徙吳中士毅自幼嗜學知向上
為聖賢事業慶元中學禁方嚴徒步入閩遵朱子命日
觀一書夜叩所見告以靜坐勿雜喚醒勿昏居數月授
以大學章句而歸終其身從事於斯號稱有得著述甚
多撰次朱子書說七卷文集一百五十卷語類一百三

十八卷又嘗類注儀禮未克成書知府王遂為買宅以居稱為考亭名士同郡名儒黃邃又謂之有道君子云興化有壺公山以壺山自號

文學鄭子上先生可學

鄭可學字子上莆田人幼而文冠而孤力學好修累舉進士不第裹糧千里從學於朱先生先生一見恨相遇之晚握手評議如夙友焉道同氣合率終歲一歸歸則以書質所疑有問斯答皆聖賢所未發之旨朱先生守

臨漳虛子弟之師席俾之西向而坐既歸則又以書招之且致諸子弟慕向不忘之意四方學者至即有問必使子上正之而仕之來南者命必見子上而後行諸公名人皆欲招致子上不可得呂祖謙李命傅詹徽之廖德明皆加敬愛與人交氣和而清竟日端坐不見怠容誠信溫恭其所誨誘皆為名士前後三奉大對嘉定辛未勅授忠州文學是歲冬廖德明為廣帥招致郡齋明年壬申秋親友勉子上調選方信儒時守春陵與之偕

行至豫章卒於豐城年六十二所著有春秋博議十卷
三朝北盟舉要一卷師說十卷詩數百篇子上不喜為
詩遇時感發時出一二不多作學禁興登朱門者畏避
退縮子上獨相從於寂寞之濱

考亭淵源錄

按朱子語錄姓氏鄭子上錄文公語在紹興二
年辛亥所開時文公年六十二其從學另考

博士傅至叔先生誠

傅誠字至叔仙遊人汶淇從子幼知讀書有雋聲年十
九以書見泉之鄉先生黃維之大奇之後淳熙八年登

進士第誠生平自讀書外無他嗜好所與語者悉皆好學清介之士非此弗與之交初調永春尉辨陳介珪之寃與上官忤因納告勅於憲臺求去介珪卒得直侍郎黃艾被旨使壯壯誠有守奏辟以行歸除廣東賢幹改知青陽縣尋除提轄文思院時參政張巖開府於京口奏辟戴溪與誠同幕凡著述皆出其手後歸朝不一跡權門累循常調遷太常博士真德秀時為正字每數日輒相過談論古今事移晷方去寧宗朝輪對其略曰臣

觀自古常有披草莽而立朝廷者况今陛下承中興以來三聖相承之業乎假如渡江初年幸未有定止荆吳陝蜀三方不相聞知陛下將不能有所運動乎古昔王者微弱如東晉重鎮擁兵上流朝廷奔命故不得已而姑息今陛下之所駕馭又非有奸雄桀黠之才微寸効可紀何所牽制而寬假至是乎假有如中興二三大將軍校號為某家人恃功驕蹇陛下將有所號令之乎又曰今日之事奄奄如氣息僅續之人略無一朝奮起之

勢浸有百年消削之憂或有聞而嘆息或有聞而竊笑者嘆息者有憂朝廷之心竊笑者有輕朝廷之意良由縉紳風俗之不振脂韋留連富貴之心有餘而感慨自立以身許國之意不足顧光景而計升沈風迹淪胥人心輕玩其弊固至此也

縣令林同叔先生澧

林澧字同叔仙遊人為建州幕廩勤自持朱文公嘉其操行書問往復相期甚厚知崇安縣清靜不擾縣圃產

芝池蓮雙花並蒂歲以大稔縣丞楊寬為記其事民立

祠曰林長官

閩書

朱先生浣

朱浣仙遊人與弟涓溉俱遊文公門

朱先生魯叔

朱魯叔

傅夢良先生公弼

傅公弼字夢良

傅先生敬子

傅敬子

傅先生毅誠

傅毅誠

侍郎黃伯耆先生父

黃艾字伯耆莆田人乾道八年廷對第二人朱子知漳州奏行經界朝議未定公言天下之大公卿百官之衆議一經界三年不成若更有大事將若之何乃詔行之

寧宗即位為右正言兼侍講及朱子罷講筵公因進講
問故寧宗曰始除熹經筵耳今乃事事欲聞公懇請再
三不聽除中書舍人改刑部侍郎以待詔終著尚書講
義

閩中理學淵源考卷十九

欽定四庫全書

閩中理學淵源考卷二十

廣平府知府李清馥撰

朱子建寧門人并交友

按宋初楊文公以文章節義倡南方人物之始厥後
游廣平胡文定述中州學派之源至朱子遷寓建陽
學徒雲集親承指要者蔡氏父子為盛若崇安建陽
劉氏一門忠節彪炳儒術尤章至末造西山真氏補

直張皇其登第之年皆在慶元之代時學禁方嚴未及門牆後與詹元善蔡節齋諸公互相往復殆私淑諸人者與

通判葉晦叔先生文炳

葉文炳字晦叔建安人舉進士調晉江簿遲次家居致書請益於朱文公及至官文公告以居官臨民之法時顏師魯為守事多咨之決汀州境上豪民相仇敵帥張忠定選官撫諭衆皆憚行文炳獨請往既至折之以理

諸豪皆伏再攝獄攝舶拒絕苞苴不遷就公卿貴人請
師魯以與徐誼陳傅良並舉於朝秩滿調劍浦令改閩
縣丞未上服母喪既闋調筠州錄叅前後兩太守寬嚴
不同文炳眡其所偏資助之嘗言獄事至重當顧理是
非不敢徇喜怒獄有巨援文炳爭守入之守有所欲入
文炳故緩其事待其自覺露既前後守多愧以服邊事
作調兵於州營卒憚行頗洶洶文炳諭以國家恭養厚
恩使奮前戮力復白州優賞之皆聽命改秩知仙遊決

累年滯訟出死獄增廩養士像故相葉正簡公於學富
室有不便民者累政不能奪聞部使者窮治之差役久
為平民害勸立義役均產通差故例建工役責之僧刹
文炳絲毫無所剪配每與同官語曰貪污自多欲尚侈
始小官俸廩幾何百爾皆欲如意不受賂安從得清心
寡欲正本澄源乃吾儒功用秩滿造朝會有旨許曾作
縣人言事文炳條便宜三事以獻通判和州將之官服

父喪尋卒

閩書

縣令范伯崇先生念德

范念德字伯崇建安人如圭之子娶劉聘君女與文公之配兄弟也初簿廬陵不小其官遇事無所苟遂以幹敏聞就辟吉州從事廬陵民素囂訟念德致中求情廉勤逮於下惴惴伸於上於是小寃必白奸無倖免因葺其問事之堂榜曰盡心大書噬嗑卦於屏上闢堂後為方丈以會文講學而朱文公為之記受學朱門他日侍文公訪張南軒於長沙同登衡嶽多所倡和文公疾革

囑其子在與念德黃幹修正禮書拳拳勉學遷朝奉郎
江東帥機宜仕終宜黃令

道南源委

閩書

按范伯崇從文公學最早文公與許順之書云將
伯崇論語數段呈李先生疑在孝宗隆興以前及

者門

縣令楊子權先生與立

楊與立字子權建安人受業朱文公之門知遂昌縣因
家蘭谿學者宗之稱船山先生所輯有朱子語略二十

卷

閩書

教授李伯諫先生宗思

李宗思字伯諫建安人從朱子學朱子稱其教深好修
篤志問學登隆興元年進士為蘄州教授專以古人為
己之學教人

道南源委

童蜚卿先生伯羽

童伯羽字蜚卿甌寧人沈默寡言好讀書詣雲谷師事
朱文公充然有得時學禁方厲遂不求仕進創樓讀書
其中文公嘗造訪之名其樓曰醉經堂曰敬義由是伯

羽以道自任日以敬義之道化行鄉里趨向彌衆時人以敬義先生稱之所著有四書集成學經衍義羣訓解

晦菴語錄

閩書

考亭淵源錄

縣令葉子是先生湜

葉湜字子是甌寧人舉進士以父任調新化簿遭母喪服闋從江淮宣司辟以論軍事不合去尉贛之寧都改承事郎承惠安縣時守泉者真文忠公文公嘗言僚佐之賢者數人而湜與昭武李方子公晦其最公晦學邃

氣平本經術明世用子是堅強介直遇事無難意處劇
無倦容他人所不能為與所不敢為者吾盡舉屬之二
人勁易不同同歸於是文忠既得二人之助二人亦相
得甚歡也湜仕終安仁令壯歲遊朱文公之門得直養
之說故其為人磊落明白無所回隱每自謂生平與賓
客言者皆可語妻子

學士劉圻夫先生子寰

劉子寰字圻夫建陽人嘉定十年進士蚤登文公之門

能詩文與同邑劉清父齊名官至觀文殿學士自號簞

嶧翁劉克莊為序其集

閩書

道南源委

進士劉叔通先生淮

劉淮字叔通建陽人紹興二年進士博學能文為詩不
事雕刻纂組而平易從容最有餘味朱子嘗當風雪寒
夜擁爐讀淮詩而跋之曰予見叔通詩多矣獨不見此
卷豈予所好者乃叔通大不得意者耶吳稚作感秋詩
初發深省其末寄意欲逃之麴蘖之間淮以碩果不食

者勵之朱子曰如叔通可謂得朋友之職矣

道南源委

主簿熊先生以寧

熊以寧建陽人少從文公遊舉進士授光澤簿剛直正大一介不妄取予嘗曰學顏子之學志伊尹之志分內事也有大學釋義中庸續說行世

閩書

丘子服先生膺

丘膺字子服從朱文公遊稱為老友吟句多佳輒酬和之時與往返論辨蔡元定謫春陵膺載俎遠郊涕泣而

別羣儕皆為感動

閩書

進士陳仲明先生旦

陳旦字仲明建陽人登進士與朱文公同榜嘗偕張敬夫從文公游未幾天喪文公誌其祖徽猷公墓深慨惜之

閩書

宣教郎周居晦先生明仲

弟明作

周明仲字居晦建陽人官宣教郎常平使者宋若水聞其風節以魏元履所立長灘社倉事屬之明仲力為振

葺魚朱子夏貸冬斂收息什二之法三年所收溢於元
額弟明作字元興亦從朱子學著有壬子問答語錄

通志

州牧馬次辛先生壬仲

馬壬仲字次辛本建陽人從朱子遊擢紹熙元年進士
乙科寓東陽遂為東陽人歷仕州縣以廉能稱嘗知古
郢撫循兵民捍禦邊寇郡賴以安尋上祠請歸壬仲議
論典型詩章閒雅所著有得齋集孫世穎世綸皆以壬
仲恩入仕

通志

推官吳溫父先生居仁

吳居仁字溫父父睿知侯官縣有廉聲居仁以特科歷古田尉攸縣丞融州節度推官所至以儒飾吏聽訟必以人倫大誼斷曲直部使者下其所斷為州縣式居官奉法無妄取朱文公稱為真廉吏

吳和中先生稚

一作吳權字仲和未知是兩人否持考

吳稚字和中

一作仲

建陽人從朱子遊所著有朱子問答

朱子卜居考亭鄉人作聚星亭欲畫荀陳遺事於屏無

從得本雅考究車服制度時稱博雅

州牧呂秀克先生勝已

呂勝已字秀克其先建陽人父尚書址死義勅葬邵武
因家焉從張南軒朱子講道朱子為和東堂九詠詩工
隸書得漢法仕湖南幹官歷倅江州知杭州官至朝請
大夫自號渭川居士

道南源委

進士魏孝伯先生應仲

魏應仲字孝伯建陽人元履之子舉進士文公貽之書

勉其力學以副親庭責望之意因教以起居坐立出入步趨處已待人

魏元壽先生椿

魏椿字元壽建陽人從朱子游有戊申語錄

黃德美先生卓

黃卓字德美建陽人博學工文尤長於詩嘗與朱文公

遊時稱騷壇元白

閩書

縣尉陳朝瑞先生總龜

陳總龜字朝瑞建陽人居與朱文公鄰壯老相從文公
嘗與書勉之問答不下百餘章登紹熙四年進士授永
豐尉未赴卒著論語解大學儒行編

道南源委

閩書

縣令江德功先生默

江默字德功崇安人祖灝歷知郴象二州郡民繪像祠
之以廉吏薦進朝散大夫默登乾道五年進士調安溪
尉丁外艱歸詣武夷從朱子講學因攜所著易訓解四
書訓誥以質朱子曰此先聖未發精奧也每以一意經

史無他嗜好德行君子稱之嘗輯本朝典故撰為綱策
上於朝略云伊尹告太甲上述成湯之事周公弼成王
近陳文武之模敢獻一得之愚用衍萬年之慶孝宗降
璽褒美賜緋魚袋後歷宰光澤建寧皆有異政卒於官
邑人祠之弟點為郢州錄叅有聲從子塤見真西山學
派道南源委

監院詹景憲先生淵

詹淵字景憲崇安人朱子門人慶元進士授臨江戶掾

江西俗囂於案牘有數十年不決者淵一閱皆得其情
凡所予奪人皆無異論部使者知其才檄致幕下監行
在車輅院真西山誌其墓

通志

縣丞陳朝弼先生範

陳範字朝弼崇安人從朱文公學舉嘉定進士調婺源
尉有大辟疑讞範察其不當死令佐受賕文致之範以
去就力爭焉後發覺令佐坐削人服其明秩滿調崇仁
丞縣令羅必元豫章先生後也日與講論政化大行一

日疾作曰不可尸素解官歸

道南委源淵源錄

閩書

考亭

丁復之先生堯

丁堯字復之崇安人篤厚慈良有志為己之學從文公

遊而與蔡季通友善早卒文公記其墓

考亭淵源錄

楊子昂先生驤

楊驤字子昂崇安人從學文公有己酉甲寅問答族弟

道夫

楊與立先生黼

楊黼字與立崇安人

楊仲思先生道夫

子若海

楊道夫字仲思崇安人與從兄與立子昂同時受學於朱子朱子答書云所論仁字大意得之更宜仔細玩味就實加功子若海游文公之門有語錄

文修葉先生味道

葉味道初名賀以字行更名知道其先括蒼人後居建陽與弟任道俱師事朱子試禮部第一偽學禁行味道

對策率本程氏知舉胡紘曰必偽徒也遂落第復從朱
子於武夷山學禁開登嘉定庚辰進士除鄂州教授理
宗訪問朱子門人所及著書部使者以味道聞差主管
三省架閣文字遷宗學輪對言人主務學天下之福也
必堅志氣以守之謹幾微以驗之正綱常以勵之用忠
言以充之至口奏又述帝王傳心之要與四代作歌作
銘之旨授太學博士兼崇政殿說書故事說書之職止
講通鑑味道請先論語從之帝忽問鬼神疑伯有之事

涉誕味道對曰伯有得罪而死其氣不散為妖為厲國
人為之不寧子產立子洩以奉其後寧神之義也三京
用師廷臣邊閫交進機會之說味道言開邊浸濶應援
倍難科配日繁餽餉日迫民不堪命龐勲黃巢之禍立
見時稱見微慮遠凡經筵奏事無不開導引翼求切君
身推致於治道遷秘書著作郎卒帝聞訃震悼出內帑
銀帛賻喪諡文修升一官故事未有也與蔡仲默黃惠
卿劉韜仲童伯羽真西山張洽諸君子友善著有四書

說大學講義易會通祭法宗廟廟享郊社外傳經筵口奏
故事講義子采見蔡節齋學派

道南源委

迪功郎祝和甫先生穆

祝穆字和甫其先新安人曾祖確名士朱文公外祖也
父康國始從文公居崇安穆少名丙與弟癸同事文公
遂以儒名性溫行醇文章富贍常著事文類聚方輿勝
覽諸司宰執程元鳳蔡杭薦其賢兼錄所著書以進除
迪功郎子洙

山長祝先生洙

祝洙景定中為興化軍涵江書院山長舊在家庭講論
精密比來涵江闡揚師訓發明經旨知軍徐直諒薦其
學行於朝方欲擢用拂袖歸

閩書

范益之先生元裕

范元裕字益之

游和之先生倪

游倪字和之從文公游著有癸丑問答

曹先生晉叔

曹晉叔從文公遊

閩書

王先生春卿

王春卿

按朱子文集卷七有山北紀行詩自註
同行諸人有建安王朝春卿疑即此公

李秉文先生德之

李德之字秉文

劉先生子晉

劉子晉

劉先生定夫

劉定夫

劉先生叔文

劉叔文

劉先生季文

劉季文

劉先生確

劉確

劉先生淳叟

劉淳叟

魏元作先生恪

魏恪字元作

劉先生瑾

劉瑾

建陽

劉先生子禮

劉子禮

江先生文卿

江文卿

主簿吳公濟先生楫

吳楫字公濟崇安人幼自雄其才謂功名可立取紹興
末試鄉省不第遂主盟林壑絕心仕進與朱文公吳郁
研窮理學嘗言逐日應接事物之中須得一時寧靜以
養精神要使事愈繁而心愈暇彼不足而我有餘文公

遣子師事之晚年以特恩調桂林簿

閩書

詹勝甫先生鎔

詹鎔字勝甫崇安人恬於榮利與朱文公蔡元定江必大諸賢講伊洛之學築涌翠亭聚書千餘卷吟咏其間

丘道濟先生義

丘義字道濟建陽人隱居不仕與朱子友善所著有易說論語纂訓傳於世從弟膺從朱子學已見上

叅議劉明遠先生如愚

劉如愚字明遠崇安人有才幹善屬文尤善吟咏居鄉日與朱子唱酬從子珙與同登第調海鹽尉終江西帥司叅議官

建寧郡志

劉嶽卿先生甫

劉甫字嶽卿崇安人衡子事親至孝武夷山北有水簾洞其棲隱處也劉珙將奏以官甫不願朱子與蔡季通每過其廬惟相與講義理不及利祿嘗約朱子結廬武夷未幾卒朱子有詩挽之

建寧郡志

閩中理學淵源考卷二十

欽定四庫全書

閩中理學淵源考卷二十一

廣平府知府李清馥撰

朱子漳州門人并交友

按閩中自道南以來泉漳學者未甚顯著至清漳又
閩之益南矣靖康中高氏登黃氏碩楊氏汝南皆以
名儒直節稱至朱子守郡教化大明風俗一變而北
溪東湖諸賢皆以夙學後先樞衣升堂然則斯郡茲

時其人文初開之始乎大賢之澤百世其昌雖莅政
僅及一期而遺風餘槩於今猶未艾也尋學脉者能
無慨係於茲邦

曹郎王東湖先生遇

王遇字子合龍溪人父羽儀紹興十二年進士遇閑居
不遠千里從遊於朱晦菴張南軒呂東萊之門而與廖
德明黃幹陳淳友善舉乾道八年進士調臨江教授再
調處蘄二州在蘄日與諸生講說漏二十刻猶徘徊學

舍注懷安丞閩帥詹體仁鄭僑延諸幕府裨贊甚多丞
相趙汝愚聞其賢將擢用之而偽學之禍起矣久之以
薦知長樂縣撙節浮費大修水利轉贛州通判薦章交
上時韓侂胄當國遇不少貶以求合侂胄敗召為太學
博士未幾除諸王宮教授適毘陵大旱命為之守力講
荒政民被實惠浙東大饑詔以提舉浙東常平入對請
齋戒以飭躬剛大以進德急聞直言以救闕失樂從公
議以扶正道當斷絕斜封墨勅之原常存視民如傷之

念至官留心賑濟一如毘陵時除大宗正遷右曹郎中
嘉定四年校策殿廬事畢而卒年七十遇居官所至介
然招之不來撼之不動朱晦菴稱其純篤呂東萊與其
篤信嗜學為人務實黃勉齋狀其行稱其學識之精義
利之明拔出流俗之表學者稱東湖先生著論孟講義
兩漢博義子仲訥以陰官羅源令

通志

漳郡志

閩

按東湖從文公游在北溪之前文公答書中有云
前月未送伯恭至鷺湖陸子壽兄弟來會又云伯
恭奉祠已久亦每談志行之美也鷺湖之會在淳
熙二年乙未味此札似淳熙二年前後及門者又

按東萊於癸巳甲午間與汪公端明書云新臨江教授王遇篤信嗜學為人殊務實願得親警欬云云又似從游於呂先於朱門矣

推察黃習之先生學皐

黃學皐字習之龍溪人父珙紹熙中以禮記兩薦於鄉學皐博通經史尤長於詩書春秋文公守漳皐與宋聞禮俱以稚年論講慶元間預鄉薦入試南宮策問三舍法弊皐謂愚獨愛伊川請改試為課及制尊賢堂待賓齋與時論不合有司大書曰此必偽學之流黜之嘉定

十六年始登第仕番禺簿趙帥師指每事必資之尤為丞相崔菊坡料院虞衡所器重再轉為鄱陽丞待制李性傳延入郡齋校勘朱文公續語錄因薦之調泉州察推需次於家郡守方來屈居學職哀論孟義利數章辨析界限以訓諸生溫陵西墅劉克遜以廉吏科薦之年七十餘丐祠歸手不釋卷所著有評古一冊

縣令宋叔履先生閏禮

宋聞禮字叔履龍溪人登嘉泰二年進士為敘州教授

再調化州知海陽縣有易禮記詩解行世

道南源委

李堯卿先生唐咨

石洪慶

施允壽

林易簡

李唐咨字堯卿龍溪人與貢士州學士石洪慶

字子餘

林

易簡

字一之

施允壽

字伯和

皆以旦評推重朱文公守郡日

延之於學為諸生楷式載之公牒各有品題云李唐咨

林易簡或究索淵微或持循雅飭察其言行久益可觀

施允壽石洪慶皆以耆艾之年進學不倦強毅方正衆

所嚴憚

漳郡志

按明周瑛曰四子學行即此牒可考矣若陳北溪文集有祭子餘文朱子語類有子餘語錄及朱子文集有堯卿與朱子問答語而一之與伯和僅見於學牒他無考謹撮拾梗概而為此一傳

朱先生飛卿

朱飛卿龍溪人受學朱門自言窮理而事物紛紜未能灑樂處唯見得富貴果不可求貧賤果不可逃耳大全集載其問答甚多

閩書 郡志

陳退之先生思謙

陳思謙字退之龍溪人學問該博教授後學嘗慰鄉薦

著春秋三傳會同及列國類編朱文公喜之以語其門人李唐咨以女妻之

縣丞楊尹叔先生士訓

楊士訓字尹叔漳浦人

今詔安

父成大鄉貢士早世事母

至孝廬墓三年哀毀慘切鬚髮為白訓性醇靜警敏刻厲自持嘗從學於陳景肅及文公守漳置賓賢齋擇士之志學者處之訓年最少預焉稱其學已知方郎中王遇見而異之妻以女所居號盤菴學者不遠數百里從

之慶元二年擢進士調古田尉再調海陽丞政尚寬和
訟者以禮義曉譬多釋爭而去後遷永福令永福俗險
健訓推誠以待之留意學校更定祭器修立壇壝人士

多頌其德

有曰德量汪乎如不撓之波接人溫乎如可
愛之日潛心可質之上帝操行不欺乎暗室

諸臺亦以慈祥豈弟聽訟平允薦之會湖廣總領請於
朝願得廉靖吏以董軍餉遂差鄂州糧料院荆襄兩路
軍儲皆屬焉未踰月卒於官平生好賙人急而自奉甚
約囊橐蕭然卒之日無以為斂總帥率所屬周旋其喪

以歸葬於官陂之南勉齋黃幹為銘

小其根其實不蕃流之長不如其源

天命靡常定理則存浚其源毋伐其根不在其身在其子孫

弟士謹登嘉定第任博

羅尉與士訓同稱七賢云

閩中理學淵源考卷二十一

欽定四庫全書

閩中理學淵源考卷二十二

廣平府知府李清馥撰

朱子延平門人并交友

延平叢爾土也自龜山先生載道而南一時從遊若
吳國華陳了翁陳知默諸賢同時講明正學迨羅豫
章李文靖一脉相傳至朱子續楊羅李之宗恢大其
統緒及門之彥若余氏大雅廖氏德明其較著者也

夫一郡英賢後先倡學盛矣而四賢者同時同郡仔肩往聖道脉抑又盛焉後之至斯土者如登東魯廟堂高山景慕低回不能去云

山長鄧先生邦老

鄧邦老以字行將樂人朱子門人陳宓守延日以邦老道德隆重而且耆年延入書院與李燾林羽蔡念成楊復余道夫李伯武趙師恕為堂長

道南源委

鄧衛老先生綱

鄧綢字衛老將樂人與其兄邦老同遊朱子之門著有

近思錄問答

考亭淵源錄

按近思錄問答一條問昔受學於周茂叔每令尋仲尼顏子樂處所樂何事綢謂孔顏之所樂者循理而已矣朱子答云此等處未易一言斷且宜虛心玩味兼考聖賢為學用力處實下功夫方自見得如此硬說無益於事也竊謂前哲求此義多矣莫如熟復文公數語為切要間嘗三復易通中論顏子一簞食一節曰不愛不求曰見其大而忘其小曰見其大則心泰心泰則無不足無不足則富貴貧賤處之一此元公迷顏子之樂之處最為親切且孔顏之樂似當就孔顏當身境遇憂樂相尋處體認尤切似難一蹴而可立談者紛紛推析繪畫乾坤之容恐未能肖似也

余正叔先生大雅 弟大猷

余大雅字正叔順昌人父良弼博學明經為政知大體
每以教化為先聚書數萬卷官廣西經略大雅與劍浦
游敬仲同時從朱文公每見必告以簡約切實工夫歸
於求放心一言兩領鄉薦省試不遇有朱子語錄一卷
余大猷字方叔亦從文公游文公稱其看得道理儘穩
實

道南源委 朱子大全

按文公答正叔書云所論正為敬義工夫不可偏
廢彼專務集義而不知主敬者固有虛憍急迫之

病而所謂義者或非其義然專言主敬而不知就日用間念慮起處分別其公私義利之所在而決取舍之幾焉則恐亦未免於昏憤雜擾而所謂敬者有非其敬矣且所謂集義正是要得看破那邊物欲之私却來這下認得天理之正事事物物頭處無不如此體察觸手便作兩片則天理日見分明所謂物欲之誘亦不待痛加遏絕而自然破矣若其本領則固當以敬為主但更得集義之功以祛利欲之蔽則於敬益有助蓋不待著意安排而無昏憤雜擾之病上蔡所謂去却不合做底事則於用敬有功恐其意亦謂此也又曰前者所論未嘗欲專求息念但以為不可一向專靠書冊故稍稍放教虛閑務要親切自己然其無事之時尤是本根所在不可昏憤雜擾故又欲就此便加持養立个主宰其實只是一個提撕警策通貫動靜但是無事時只是一直如此持養有時便是

非取舍所以有直內方外之別非以動靜真為判然二物也上蔡之說便是如此亦甚要切但如此警覺久遠須得力爾千萬且於日用間及論語中著力令有箇會通處即他書亦不難讀爾再按傳中正叔與游敬仲同時從文公游按朱子語錄考之姓氏錄文公語淳熙五年戊戌以後所聞者從游侯再考再按陸稼書先生讀朱隨筆論後一條按云凡朱子所言內外動靜處可見其未嘗有所偏矣果齋李氏所謂晚見諸生繳繞於文義之間始頗指示本體者亦是此意而豈如姚江所謂晚年定論也哉

宋先生宰

宋宰字

關

沙縣人

張敬之先生顯父

張顯父字敬之順昌人

游連叔先生敬仲

游敬仲字連叔南劍人

閩中理學淵源考卷二十二

欽定四庫全書

閩中理學淵源考卷二十三

廣平府知府李清馥撰

朱子邵武汀州門人并交友

按邵武人文舊號小鄒魯唐以前尚矣宋初游氏烈
從胡安定講學以經術為郡人之倡厥後鄒堯叟李
西山盧奎何兌朱震皆受學於劉執中楊文靖馬東
平胡武夷諸賢至若嚴氏桀之經說李氏忠定之偉

略皆為學者所宗仰迨朱子接道南統緒其執經問業者尤多於時修文授經砥名立行後先炳蔚與建安諸郡未易優劣也至長汀一郡如徐氏守忠宋初時受知於歐陽文忠胡安定李太伯諸賢而清修佚德亦皆有人然彼時聲氣未孚紹述者尚寥寥有幾至及朱子之門者只楊氏子直一人而已蓋亦風氣初開之始也今併附焉

縣令何叔京先生鎬

何鎬字叔京邵武人父兌始仕為左朝奉郎通判辰州
生鎬孝謹有器識既出就傳暮歸則不復去親側誦書
日數千言為文敏而有思趣尚高遠識者奇之辰州嘗
受程氏中庸之學於東平馬公伸服行不怠又以其忠
節事狀移書太史忤秦檜下吏竄南方扼死不恨間復
悉以其所聞者語鎬既受其說則益務貫穿經史取友
四方博考旁資以相參伍久而自信於是一意操存杜
門終日澹然無營至其論說古今指陳得失則又明白

慷慨可舉而行平居崇德義厲廉節絕口未嘗及功利
至於收族恤孤興事濟衆則懇惻憂勞如己嗜欲言行
相循沒身不懈由此南州之為程學者始又知有馬氏
之傳焉始用辰州致仕恩補官授泉州安溪主簿未赴
再調汀州上杭丞數行縣事專用寬簡為治白罷稅外
無名之賦人便安之部使者鄧伯熊行部顧郡事不理
囚繫或累歲月不得釋檄鎬佐其守悉取文書閱視具
得其情決遣之旬日皆盡又以田稅不均貧弱受病所

以均之甚備守顧不悅鎬即謝去一時學士寮友推其
學行多師尊之而當路鮮識之者調潭州善化令將行
而卒年四十八朱子撰墓碣稱鎬為人清夷恬曠廉直
惠和談經論事簡易條暢所著書有易論語史論諸文
數十卷其言多可傳者築書堂所居南坂上名以高遠
用見已志素與朱子友善嘗與書曰執事家學淵源之
正而才資敏銳絕出等夷其深造默識固有超然非誦
說見聞之所及也而其口講心潛躬行力踐已非一日

之積詞旨奧博反覆通貫三復竦然有以仰見其所存之妙云

按朱子撰墓碣叔京在淳熙二年沒曾與何叔京第一書在李先生歿後自是隆興二年以後書中有杜門奉親則在乾道五年以前之札與蔡季通先生受業相先後者又與書曰李先生教人大抵令於靜中體認大本未發時氣象分明即處事應物自然中節此乃龜山門下相傳指訣然當時親炙之事貪聽講論又方竊好章句訓詁之習不得盡心於此至今若存若亡無一的實見處辜負教育之意每一念此未嘗不愧汗沾衣也脫然之語乃李先生稱道之過今日猶如掛鉤之魚當時寧有是耶然學者一時偶有所見其初皆自悅懌以為真有所自得矣及其久也漸次昏暗淡泊又久

則遂泯滅而頑然如初無所睹此無他其所見者
非卓然真見道體之全特因聞見揣度而知故耳
竊意當時日聞至言觀懿行其心固必有不知所
以然者泊失其所依歸而又加以歲月之久汨沒
浸漬今則猶然為庸人矣此亦無足怪者因下問
之及不覺悵然集為庸人矣此亦無足怪者因下問
闕書考亭淵源錄朱子大全

州牧趙佐卿先生善佐

趙善佐字佐卿邵武人受學張敬夫又從朱子游以宗
室子試授將樂丞累知秦州常德贛州奉法愛民以勤
儉自約飭在贛逾年卒民哀思之著易疑問答道南源委

梁文叔先生琢

梁琢字文叔邵武人從遊朱子刻志勵學所論為學工夫及體氣魂魄鬼神之說朱子多許可之又輯朱子語錄澹臺石刻

按文公答文叔書云日用功夫如此甚善然須實下功夫只是說得不濟事也李先生意只是要得學者靜中有箇主宰存養處然一向如此又不得也觀文公答問此數句即想見延平心傳文叔必從事於斯者公故以此告之

吳大年先生壽昌

吳壽昌字大年邵武人初謁浮屠疎山喜談禪後游朱

門著問答錄嘗論張栻呂祖謙以南軒非壽昌所敢知
東萊博學多識則有之守約恐未也朱子深然之

通志

道南源委

教授吳茂實先生英

吳英字茂實邵武人從朱子學有論語問答略登紹興
三十年進士仕至泉州路教授

按文公與茂實書云近來自覺向時工夫止是講
論文義以爲積集義理久當自有得力處却於日
用工夫全少點檢諸朋友往往亦只如此做工夫
所以多不得力今方深省而痛懲之亦願與諸同

志勉焉幸老兄徧以告之也陸子壽兄弟近日議論與前大不同却方要理會講學其徒有曹立之萬正淳者來相見氣象皆儘好却是先於性情持守上用力此意自好但不合自主張太過又要得省發覺悟故流於怪異耳去其所短集其所長自不害為入德之門也然其徒亦多有主先入不肯捨棄者萬曹二君却無比病也觀書中及陸子壽兄弟子壽卒在淳熙七年時朱子年五十一則此書在五十一歲前所寄

馮作肅先生允中

馮允中字作肅邵武人從朱子學朱子名其齋曰見齋所論懲創後生妄作之弊朱子善之又云情本於性故

與性對心則有知覺而能為之統御者也未動而無以
統之則空寂而已已動而無以統之則放肆而已朱子
深以為然

道南源委

按文公與作肅書云欲立人欲達人之說令其更
白叔京兄質其可否復以見諭自在淳熙二年以
前及門者是時邵武叔京從遊
而作肅嵩卿諸賢相踵勃起矣

葉直翁先生寅

葉寅字直翁邵武人少飄蕩豪爽方士繇語之曰以子
才俊何善不可為乃甘心里巷以辱其身耶寅感泣問

過可改否曰惟狂克念作聖於是奮勵修飭俛就朱子之門而問學焉謹言慎行以求精詣鄉人敬嘆之

考亭

淵源錄

州牧俞夢達先生聞中

俞聞中字夢達邵武人從學朱子淳熙八年進士知黎

州恣意撫字民夷感德

通志

閩書

宣獻任伯起先生希夷

任希夷字伯起其先眉州人四世祖伯雨為諫議大夫

其後仕閩因家邵武希夷少刻意問學為文精苦登淳熙三年進士第調建寧府浦城簿從朱文公學篤信力行文公器之曰伯起開濟士也開禧初主太常寺簿奏紹熙以來禮書未經編次歲月滋久恐或散亡乞下本寺修纂從之遷禮部尚書兼給事中謂周惇頤程顥程頤為百代絕學之倡乞定議賜謚其後惇頤謚元顥程頤謚正皆希夷發之進端明殿學士僉書樞密院事兼權參知政事史彌遠柄國久執政皆具員議者頗譏

其拱默尋提舉臨安府洞霄宮卒贈少師謚宣獻著經
解經筵故事奏議表箋內外制集

考亭淵源錄

道南

縣令李子賢先生東

李東字子賢忠定公族孫也受學朱子紹熙中登第簿
廬陵秩滿周必大餞以詩云地跨江南秀氣兼玉成界
尺直方廉西曹久處習鑿齒高士惟知孫子嚴遷知萬
安黃幹薦於漕使稱其精敏楊楫乞委以事而觀其能

道南源委 閩書 考亭淵源錄

修撰葉成之先生武子

葉武子字成之邵武人初遊鄉學學周禮於永嘉徐元德既與李方子友同受學朱門後補太學生時議函韓侂冑首和金武子曰奸臣首固不足惜如國體何率同舍力爭嘉定中擢甲科注岳州教授有貧而母老者名在其下亟遜之久之授郴州累陞知處州拊循民瘼奏除苛取之弊麗水盜發郡發兵討捕而里正執讐民以歸武子問實得三人斬以徇餘釋之民大服盜亦息入

為宗學博士以福建保長催科害民陞對論罷之請老
歸屬召不起尋落致仕籍除直秘閣嘉熙間進直寶謨
閣奉祠仍乞致仕淳祐三年以其雅志恬退掛冠日久
賜詔褒美特陞直龍圖閣五年進秘閣修撰六年卒武
子之學所得於易為多其言曰易道莫大於時時有二
義有在外之時有在我之時士君子出處須先論在我
之時嘗戒子弟謂身後毋作行狀葬無銘誌唯劉克莊
誌吳炎墓稱炎與武子為古君子

閩書

考亭淵源錄

縣令饒廷老先生幹

饒幹字廷老邵武人自幼孝謹篤學登進士第調吉水尉轉知長沙適朱文公為守遂受業焉夙興治事暇入聽講後知懷安軍卒有為之銘曰能琢磨而器吾之玉乎則心皇皇如不足能烜赫而丹吾之轂乎則足縮縮如不欲故樂也不加若性而污也不懼其辱是謂善學朱氏者蓋不惟其名而實之篤

閩書

縣丞劉德言先生剛中

劉剛中字德言光澤人少讀書詞義有契輒為之贊從學於文公公問平日讀何書剛中說看語孟荀揚莊老諸書公云須看語孟若荀揚乃誤人之書莊老乃壞人之書剛中遂專聽公言公為易其字曰近仁與黃幹友善舉嘉定四年進士調漢陽縣主簿轉婺州蘭溪縣丞後歸築室以居名曰琴軒從學者甚衆述有師友問答

一卷

考亭淵源錄

丘玉甫先生珏

丘珏字玉甫從朱子學有主敬問答學禁嚴遂謝場屋

黃令裕先生孝恭

黃孝恭字令裕從朱子學治家嚴整論著確實

黃仲本先生瀚

黃瀚字仲本從朱子學嘗作朋友說朱子為跋

黃德柄先生謙

黃謙字德柄

按文公與方伯謨書云某近嘗一至雲谷留十餘日朋友來集隨分有少講論大率追正舊說之太高者也克明德柄皆未及書煩為致意考書中云在雲谷疑在淳熙初年意是中歲及門者

劉潛夫先生炎

劉炎字潛夫

饒先生克明

饒克明邵武人

連嵩卿先生崧

連崧字嵩卿

按文公與何叔京書述及嵩卿考叔京在淳
熙二年沒嵩卿自在淳熙二年以前及門者

閩中理學淵源考卷二十三